



Nuuk, 25. januar 2007

Inatsisartut Suleriaasianni § 36 imm. 1 naapertorlugu Naalakkersuisunut apeqqut imaattoq matumuuna saqqummiuppara:

**Royal Greenland-ip Poleninimi ingerlataasa qanoq ingerlanerat pillugu Naalakkersuisunut apeqquteqaat. Pilersaarutaasutut aalisakkanut suliffissuassaq piviusunngortinneqarpa ?
Aamma suliffissuaq qanoq ingerlava ?**

(Inatsisartuni ilaasortaq Ruth Heilmann, Siumut)

Tungavilersuut:

Royal Greenland-ip Poleninimi ingertai pillugit matumuuna itinerusumik paasitinneqarnissara piumasaraasra.

Siorna taamaalinerani Naalakkersuisunut ilaasortaq Siverth K. Heilmann peqatigalugu angalaqatigiinnut peqataavunga, pulaarneqarput Royal Greenland-ip ingerlatai Tysklandimi, Poleninimi, Danmarkimilu tassa ingerlatseqatigiiffissuup Europami ingerlatai taamatullu imaanit nerisassianik niuernermi nunarsuarmi ineriartornerup ingerlatseqatigiiffissuarmut pinginnittuinullu piumasaqaatai pillugit paasissutissinneqarluta sisunissaq qaninnerusoq ungasinnerusorlu eqqarsaatigalugit.

Paasitinneqarpugut Royal Greenland-ip siunertarigaa niuerfinni toqqarneqartuni ingerlaavalersumik pilersuisussatut piumaneqarnerulernissaq imaanit nerisassiassanik ingerlatsinermi. Tamanna angusinnaajumallugu ingerlatseqatigiiffissuup sulissutigaa imaanit nerisassiassanik ingerlatsineq aningaasarsiorfiusoq, ineriartornermut annertusiartornermullu periarfissiisoq pinginnittunut, sulisunut inuiaqatigiinnullu suliffeqarfissuup ingerlataqarfiiniittunut iluaqutaalersumik.

Naalakkersuisunut ilaasortaq naapertorlugu ingerlatseqatigiiffissuup nunani allani pilersaarutai nunatsinni ingerlatat pitsaasumik ineriartortinnissaannut akornusiisussaannngillat.

Naalakkersuisunut ilaasortaq naapertorlugu maani aamma siunertaqarluartunik ineriartortitsinisanut pilersaaruteqartariaqarpoq Royal Greenland-imut inuiaqatigiinnullu naleqarnerulersitseqaataasunik. Tamannami pisinnaammat ingerlatseqatigiiffissuup nunani allani ingerlataasa iluaqutiginerisigut aammalu taamatut ingerlataqartut allat nakussat suleqatiginerisigut.

Naalakkersuisunut ilaasortaq naapertorlugu, pitsaassagaluaqaaq malitsigitillugu imaluunniit tamatumunnga atatillugu naalakkersuisut naalakkersuisunulluunniit ilaasortat suliamut attuumasuteqartut ingerlatseqatigiiffiup siulersuisuinik qullersaanillu ataatsimeeqateqartuuppata qanoq iliuusissatut pilersaarutit eqqartorlugit.

Taamaattumik paaserusuppara eqqarsaatit pilersaarutillu tamakku sumut killinnersut. Tamatumungalugu ilanngullugu Tunisassiorfiit sumut killinnerat pillugu ilisimatinneqaqqullunga.